

Illup sananeqarneranut akiusup minnerpaaffissaata inatsisitigut aalajangersarneqartup appartinneratigut pisortat inissiaataanni attartortittakkani ineqarnermut akiliutip appartinneqarnissaanut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsisinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit aserfallassimasut sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneru Inatsisartunut kingusinnerpaamik UKA 2021-mi agguanneqassapput.

(Inatsisartuni ilaasortaq Erik Jensen, Siumut)

Akissuteqaat

(Ineqarnermut Attaveqatigiinnermullu Naalakkersuisoq)

Siullermeerneqarnera

Naalakkersuisut 2020-mi februaarip arferngani Inissianut Tamarmiusunut Pilersaarut akueraat, tassanilu siunissami pisortat inissiaataasa siunissaannut tunngavissat anguniagassallu aalajangersarneqarput, ilaatigullu ineqarnermut akiliutit imminnut nammassinnaasut pillugit najoqqutassianik misissuinissaq ineriartortitsinissarlu, taamaalillunilu siunissami inissiat aserfallatsaalineqarnissaannik, peqqinnartuunissaannik naleqquttuunissaannillu qulakkeerinissamik siunnerfigineqarpoq,

Tamatumalu peqatigisaanik ineqarnermut tapiissutinik iluarsiinikkut inoqutigiit akissaatikitsut akiliisinnaanerilu eqqarsaatigineqassapput.

Suliniutit siunissamut ungasissumut inuiaqatigiinnut iluaqtissanik pilersitsissapput – attartortunuinnaangitsoq, kisiannili aamma iluarsaassinernut atatillugu suliffissanik taamaalillunilu sulisartut pisinnaasaannik annertusaanermik nassataqartussamik pilersitsinermut kiisalu ilinniarnermi inissamik amerlanerusunik pilersitsinissamut periarfissiisussaalluni.

Pisortat inissiaataanni amerlasuut aserfallatsaalineqannginnerat ilisimaneqarpoq. Tamatuma kingunerisaanik Nunap karsia annertuumik sunniuteqarfigineqarpoq. Assersuutissani kingulleq tassaavoq, altaninik iluarsaassineq nukingiuinneqartoq, tassangaannartumik aserfallatsaaliuinnermut atugassanik aningaasaleeqqiinikkut pisariaqartinneqarsimmamata.

Taamaattumik ineqarneq tamakkerlugu eqqarsarnissaq Naalackersuisunit pisariaqartinneqarpoq. Ineqarnermut akiliutinik aaqqissusseqqinnermi suliassaqarfik tamarmi isiginiarneqartussaavoq, ineqarnermut akiliutit immikkoortui kisimik pineqaratik. Pisortat inissiaataat pitsaasuussapput, peqqinnartuussapput aammalu akuersarneqarsinnaasumik pitsaassuseqarnissamut malinnissallutik. Tamannarpiaq Naalackersuisut Inissianut Tamarmiusunut Pilersaarut malillugu sulissutigaat.

Tamanna tunngavigalugu siunnersuut akuerineqassasoq Naalackersuisunit inassutigineqarpoq, aammalu apeqqutigineqartut suliame ingerlasumi qaammarsaavigineqarumaartut uppersarsarneqarsinnaavoq.